

ეთიკის კომისიის

რეკომენდაცია

მეოთხე დისციპლინური კოლეგიის შემადგენლობა:

ციცინო ცხვედიანი – კოლეგიის თავმჯდომარე

გოჩა სვანიძე – კოლეგიის წევრი

თორნიკე ბაქრაძე – კოლეგიის წევრი

შეკითხვის კომისიაში შემოსვლის თარიღი: 30.01.2014

შეკითხვის რეგისტრაციის ნომერი: 001/14

შეკითხვა:

ადვოკატი სამსახურებრივი მოვალეობის შესრულების დროს, სისხლის სამართლის საქმეზე, იცავდა ერთ-ერთი ბრალდებულის ინტერესებს გამოძიებასა და პირველი ინსტანციის სასამართლოში. აღნიშნული სისხლის სამართლის საქმე განიხილა სასამართლომ და მის მიმართ გამოიტანა გამამტყუნებელი განაჩენი.

აღნიშნული საქმიდან გამომდინარე, ბრალდებულმა, რომლის ინტერესებსაც იცავდა ადვოკატი, უჩივლა პოლიციის თანამშრომლებს და საჩივარში მიუთითა, რომ იგი დაკავების დროს პოლიციის თანამშრომლებმა სცემეს და სახის არეში მიაყენეს სხვადასხვა სახის დაზიანებები, რის შესახებაც პირველი შეხვედრისას წინასწარი დაკავების იზოლატორში თითქოსდა მან აცნობა მისი ინტერესების დამცველ ადვოკატს. რეალურად, ხსენებულ ბრალდებულს, აღნიშნული ინფორმაცია ცემის ფაქტთან დაკავშირებით ადვოკატისათვის არ უცნობებია. ასევე, მას არ აღენიშნებოდა დაზიანების კვალი სახის არეში.

საქმის გამომძიებელი ითხოვს ადვოკატის დაკითხვას იმ ფაქტთან დაკავშირებით, აცნობა თუ არა ხსენებულმა ბრალდებულმა აღნიშნულის შესახებ და, ასევე, ემჩნეოდა თუ არა სახის არეში დაზიანებები. ადვოკატი აპირებს საქართველოს ს.ს.ს.კ. 50-ე მუხლის 1-ლი ნაწილის „ა“

ქვეპუნქტის გამოყენებასა და ჩვენების მიცემაზე უარის თქმას, თუმცა, მას გამომძებელმა განუცხადა, რომ თუ არ მისცემს ჩვენებას, ეს შეფასდება ჩვენების მიცემაზე უარის თქმად და, შესაბამისად, დადგება ადვოკატის სისხლისსამართლებრივი პასუხისმგებლობის საკითხი.

თუ ადვოკატი მისცემს მისი ყოფილი კლიენტის საწინააღმდეგო ჩვენებას და იტყვის სიმართლეს, რომ მისთვის ბრალდებულს არ უთქვამს არაფერი და არც სახის არეში შეუნიშნავს დაზიანება, შეფასდება თუ არა ეს ეთიკის კოდექსის დარღვევად?

ანალიზი:

„ადვოკატთა შესახებ“ საქართველოს კანონის მე-7 მუხლი:

1. ადვოკატი ვალდებულია:

- ა) დაიცვას პროფესიული საიდუმლოება, გასული დროის მიუხედავად;
- ბ) კლიენტის თანხმობის გარეშე არ გაავრცელოს საადვოკატო საქმიანობის განხორციელების პროცესში მისგან მიღებული ინფორმაცია.

2. ადვოკატის მიერ პროფესიული საიდუმლოების დარღვევა იწვევს ამ კანონით და ადვოკატთა პროფესიული ეთიკის კოდექსით გათვალისწინებულ პასუხისმგებლობას.

ადვოკატთა პროფესიული ეთიკის კოდექსის მე-4 მუხლი:

1. ინფორმაცია, რომელიც ადვოკატისთვის ცნობილი გახდა მისი პროფესიული საქმიანობის განხორციელებისას, კონფიდენციალურია. ადვოკატი ვალდებულია დაიცვას კონფიდენციალური ინფორმაცია იმგვარად, რომ მესამე პირებს მასზე ხელი არ მიუწვდებოდეს. კონფიდენციალობის ვალდებულება ვრცელდება ნებისმიერ ინფორმაციაზე, რაც ადვოკატისთვის ცნობილი გახდა კლიენტისაგან ან იურიდიული რჩევის მიღების სხვა მსურველისაგან, რომელიც ადვოკატმა მიაწოდა კლიენტს ან ადვოკატმა სხვა წყაროდან გაიგო კლიენტთან ან მის საქმესთან დაკავშირებით.

2. კონფიდენციალობის ვალდებულება არ არის შეზღუდული დროში.

3. ადვოკატმა განზრახ არ უნდა გამოიყენოს კონფიდენციალური ინფორმაცია:

- ა) კლიენტის წინააღმდეგ;
- ბ) საკუთარი ან მესამე პირის მიზნებისათვის, გარდა იმ შემთხვევისა, როდესაც კლიენტი შესაბამის თანხმობას განაცხადებს.

4. ადვოკატს შეუძლია გაამჟღავნოს კონფიდენციალური ინფორმაცია:

- ა) კლიენტის თანხმობის საფუძველზე;
- ბ) თუ ინფორმაციის ამგვარი გამოყენება წარმომადგენლობის ან დაცვის პროცესში გამართლებულია და აუცილებელია კლიენტის ინტერესებიდან გამომდინარე იმ პირობით, რომ ასეთი ინფორმაციის გაცემა კლიენტს ადვოკატისთვის წინასწარ არ აუკრძალავს;
- გ) თუ ეს აუცილებელია ადვოკატის მიერ მის მიმართ წაყენებული ბრალდებისაგან ან მოთხოვნისგან თავის დასაცავად ან საკუთარი ჰონორარის მიღებისათვის.

ადვოკატთა პროფესიული ეთიკის კოდექსის მე-5 მუხლი:

ადვოკატმა ყოველთვის უნდა იმოქმედოს კლიენტის ინტერესებიდან გამომდინარე და დააყენოს ისინი პირადი და სხვა პირების ინტერესებზე მაღლა. თუმცა კლიენტის ინტერესების დასაცავად ადვოკატის მოქმედებები უნდა შეესაბამებოდეს კანონმდებლობას და ადვოკატთა პროფესიული ეთიკის კოდექსს.

მოცემულ შემთხვევაში კლიენტი არათუ თანხმობას აცხადებს ადვოკატის მოწმედ დაკითხვასა და ჩვენების მიცემაზე, არამედ ამის ინიციატივას იჩენს და აქტიურ სურვილს ამჟღავნებს იმ იმედით და რწმენით, რომ ადვოკატი დაადასტურებს იმ გარემოებებს, რასაც იგი მიუთითებს თავის საჩივარში. კერძოდ, კლიენტი დარწმუნებულია, რომ ადვოკატი დაადასტურებს იმ ფაქტს, რომ იგი დაკავების დროს პოლიციის თანამშრომლებმა სცემეს და სახის არეში მიაყენეს სხვადასხვა სახის დაზიანებები და რის შესახებაც პირველი შეხვედრისას წინასწარი დაკავების იზოლატორში თითქოსდა მან აცნობა მისი ინტერესების დამცველ ადვოკატს.

თავის მხრივ ადვოკატი არ აპირებს მისცეს გამომიებას იმგვარი ჩვენება, რაც სურს კლიენტს იმ მიზეზით, რომ ეს არ შეესაბამება სინამდვილეს და შესაბამისად წარმოადგენს ცრუ ჩვენებას, ცრუ ჩვენების მიცემა კი არის კანონსაწინააღმდეგო ქმედება.

კანონსაწინააღმდეგო ქმედების ჩადენა დაუშვებელია, თუნდაც ეს კლიენტის ინტერესების დაცვისკენ იყოს მიმართული.

მართალია სსსკ 50-ე მუხლის 1-ლი ნაწილი უფლებას აძლევს ადვოკატს უარი თქვას ჩვენების მიცემაზე, ხოლო „ადვოკატთა შესახებ“ საქართველოს კანონის მე-7 მუხლის 1-ლი პუნქტის „ბ“ ქვეპუნქტი და ადვოკატთა პროფესიული ეთიკის კოდექსის მე-4 მუხლის „ა“ პუნქტი არ უკრძალავს მას ჩვენების მიცემას, ადვოკატმა უნდა გაითვალისწინოს, რომ მის მიერ ჩვენების მიცემამ შესაძლოა წარმოშვას კლიენტის პასუხისმგებლობა ცრუ დასმენაზე, რაც შესაძლოა წინააღმდეგობაში მოვიდეს ადვოკატთა პროფესიული ეთიკის კოდექსის მე-5 მუხლის მოთხოვნასთან: *ადვოკატმა ყოველთვის უნდა იმოქმედოს კლიენტის ინტერესებიდან გამომდინარე და დააყენოს ისინი პირადი და სხვა პირების ინტერესებზე მაღლა. თუმცა კლიენტის ინტერესების დასაცავად ადვოკატის მოქმედებები უნდა შეესაბამებოდეს კანონმდებლობას და ადვოკატთა პროფესიული ეთიკის კოდექსს.*

დასკვნა:

ამდენად, მოცემულ შემთხვევაში ეთიკის კომისია მიიჩნევს, რომ ადვოკატის მიერ სსსკ 50-ე მუხლით მონიჭებული უფლების გამოყენებაზე უარის თქმა და ჩვენების მიცემა შესაძლოა შეფასდეს ადვოკატთა პროფესიული ეთიკის კოდექსის მე-5 მუხლის მოთხოვნათა დარღვევად.

შესაბამისად ადვოკატმა უნდა ისარგებლოს სსსკ 50-ე მუხლით მინიჭებული უფლებით და უარი უნდა თქვას ჩვენების მიცემაზე.

რეკომენდაცია არ არის სავალდებულო ეთიკის კომისიის ან სასამართლოს მიერ რომელიმე დისციპლინური საქმის განხილვისას. თუმცა შესაძლებელია გამოყენებული იქნეს ერთ-ერთ წყაროდ ეთიკის კომისიის გადაწყვეტილებაში.

კოლეგიის თავმჯდომარე:

/ციცინო ცხვედიანი/

კოლეგიის წევრი:

/გოჩა სვანიძე/

კოლეგიის წევრი:

/თორნიკე ბაქრაძე/